

Was merr su alles wisse will

Omm letzde Freidaach hott misch de Hubert oogerufe unn isch habben gleich gefroochd, wiesem gieht doo owwe im Norde unn was soi Aache mache.

Doo seeder: Hannes, eigentlich wollte ich ja von dir so einiges wissen, aber wenn du schon fragst: Mir geht es gut, bis auf mein Augenlicht, doch das weißt du und auch, dass es damit nicht besser wird, aber es wird auch nicht schlechter, und so kann ich noch mit dem Auto zum Einkaufen fahren, große Strecken fahre ich nicht mehr.

Ja, Hubert, gebb isch ze Antwort, mir giehts ähnlisch, merr werdd halt älter. Awwer moi Aache sinn noch gut unn dessdeweese fahrn merr ab unn zu ins Ried bis zum Kiehkobb odder in de Rhoigau. Entschuldische, awwer du wollst e bissi was wisse.

De Hubert druff: Hannes, zuerst wollte ich fragen, ob du und deine Frau schon geimpft seid und wenn ja, wie euch die Impfung bekommen ist?

Isch saach: Also, mir sinn vor zwaa Daach, also omm vergangene Mittwoch, im Kasdegrund korrz hinner Weilbach geimpft worrn, die Fraa hotts gut iwwerstonne, awwer isch hadd omm nächsde Daach unn noch zwaa Daach hinnerher zuerst enn starke unn donn noch enn leichde Schwindel gehabbd, awwer su Newewirkunge warn joo beschriwwe unn isch habb halt doodemett rechene misse.

Na, seet de Hubert, dass hört sich ja ganz gut an. Übrigens werde ich Ende März geimpft, ich werde dir berichten. Aber was ich noch wissen wollte: Am Sonntag ist Wahl in Flörsheim, aber wie ich euch kenne, habt ihr schon gewählt.

Isch habb ins Telefon geniggd. Ja, per Briefwahl. Ach waaßde, Hubert, mett dene ville Babiern und dene ville Nome druff hosde dehoom doch mieh Zeit, dir dess alles oozegugge unn donn auszewähle. Isch habb nor grinse misse, weil frieher hott merr drei Kreizjer gemachd, wenn ooner gonge iss, unn heit mussde drei Kreizjer mache, wenn ooner kumme soll.

De Hubert hott lache misse, seet awwer: Und das letzde was ich von dir wissen will: Es geht ja bald wieder los mit der Vereinsarbeit und da müssen Briefe geschrieben werden, wie haltet ihr es mit der Anrede der Mitglieder?

Jetzt habb isch gelacht. Naja, du moonsd dess meddem Sternche? Awwer Hubert, nitt nor weil mir vumm alde Schlaach sinn: Bei uns duts koo Sternche unn aach koon Doppelpunkt, Unnerstrich odder wer waaß was gewwe. Mir schreiwe: Liebe Mitglieder, unn doodemett sinn Fraue unn Männer gemoont, odder mir schreiwe: Liebe Kameradin, lieber Kamerad. Hädde merr enn Hinkelszüchterverein, deede merr schreiwe unn uff dess bissi Druckerschwärz käms werklisch nitt oo: Liebe Züchterin, lieber Züchter unn uff koon Fall: Liebe ZüchterInnen, also meddem grüße I innedroi, weil bei all dene Zesomesetzungge werrn die Fraue hinner de Männer uffgefiehrd unn su ebbes hawwe mir Alde nitt gelernt, mir erwähne die Fraue zuerst.

De Hubert hott enn Aacheblig noochgedenkd, donn seeder: Im Fernseher und im Radio hört man ja öfter den Spruch: Zu Risiken und Nebenwirkungen lesen Sie die Packungsbeilage und fragen Sie Ihren Arzt oder Apotheker. Das soll ja anders werden indem es in Zukunft heißt: Zu Risiken und Nebenwirkungen lesen Sie die Packungsbeilage und fragen Sie Ihre(n) Arzt/Ärztin oder Apotheker/Apothekerin.

Siehsde, saach isch, aach hier widder die Fraue hinnedroo. Isch frei misch jetzt schunn druff, dess im Fernseh odder im Radio ze heern; isch glaab, isch lach mich kabutt!

Eiern Honnes